

Preddich beim Ökumenischen Jottesdienst zum Karneval 2025 Bonner Münster 9.1.25

Leev Christeminsche,

in de nächste Woche werden widder vill Mensche durch die Säle und üvver de Stroße van ause Bundesstadt trecke, kunterbunt kostümiert, mächmol kaum widder ze erkenne. De Fantasie sin jo kin Jrenzen gesetzt, un me kann immer widder nur jruße Ojen mache und staunen, up wat für en Ideen de Minsche kumme – sich in em dolle Kostüm parat ze mache. De Freud kennt jott sei Dank vill Weech, sich Bahn ze breche!

Jruße Oje und jestaunt han damals, wie mer jrad jehurt han, uch de Lück över ausen Heer, Jesus Christus, över dat, wat hä jesaat und jedonn hät. Un ich jläufen, uch Jesus selever hät nit selten över de Minschen jestaunt, und die Art, wie se up sing Botschaft reajiert han. Et dät mich nit wundere, wen hä no der Episod mit demm Zacheies für sich jesaat hat:

Ja - su is dat: wie me et maat, maat met verkiert: me kann et nit allen räch mache!

De Zacheies is bahl jebasch vür Freud – un de Fromme han nur de Kopp jeschutt und jesaht:

Süht üch dä doll ahn: Hä jütt sich mit Zöllner av und sündije Minsche, un iss sojar mit inne! Nä – wo sime do hinjekumme. Dä Minsch stellt einfach alles up de Kopp, wat mir für richtig gelihrt han und wat uns hillig iss!

Et süht esu us, als wör ze kalle, wie Jesus dat jedonn hätt, äver och verdamm nüdisch jewäs. Denn denne Fromme woren de Jesetze wichtiger als de lebendije Minsche.

Leever als sich mit de ärme Minsche avzejeve, un ze helepe, däten se mit de hillije Schriften im Ärm danze. Leever als de Lück Mood ze mache un Freud, däten se uproove, Tieropfer ze bränge und Angst vürm Herrjott schüre. Und do hätt Jesus jesaht: Su jeht et nit!

Dorüm hätt er alles anders jemaht:

Er ist jrad no dennen jejange, mit denne kinne jet ze dunn han wohl, und hät gezeich: Uch ihr sitt vam Herrjott anjenomme. Hä traht üch

zo, dat ür üch ändere künnt. Ihr sitt nit nur schläch – ich sehn üre joode Kärn – Jrad die, die sich kleen und unbedeutend vürkoomen, als jehörten se nit dobei, han im Ojenblick Jesu jespurt, dat se für en ganz wertvoll woren und einmalig. Jesus hät die Liebe, die er im hezen hat, einfach strömen losse, und er hät sich uch nit bremsen lossen durch Grenzen und Konventionen, die mir Minsche unnötigerweise upjebaut hatten. Nit nur an de Fromme sondern uch an de heiden hät he Jottes Jüte jruszüjig usjedeilt.

Su wor et zum Beispiel modig van em, dat hä einfach up Fraue zojejange is, mit dennen verzällt hät – denn dat dät me nitt: wie mit de Frau am Jakobspüz – und er hät de Frauen noh singer Auferstehung als irste domit beauftrach, allen wigger ze verzälle, dat hä leev. Wat en Ehr und wat en Verantwortung?

Jesus hät de Welt up de kopp jestellt, weil hä de Kinger, die domols nüs ze bedüggen hatten, mizzen tücher de Jrußen geroofen , und jesaht hätt: *An de Kingerr müsst ihr üch en Beispiel nämme. Dot doch et Levve och ins spielerisch betrachte, und nit so verbissen und bitter ernst. Beöcht üch doch mit mih Vertraue und weniger Misstraue – so, wie de Kinger in et Levve jon. Dot üch doch nit nur avvsichere, sondern jevvt uch dem Abenteuer in ürem Levve mi Platz.*

Un loss mer us dran erinnere, wie er am Sabbat, demm Ruhedaach, Kranke jesund jemat hät, obschon me dat an sunem Daach jarnit durff. Jesus hät ein fü alle mol klorjestellt: *De Sabbat is für de Minsche do, und nit de Minsch fü de Sabbat!*

Janz besonders jeärjert hätt er sich, wenn er mitbekoom, dat Minsche sich für jett besseres halde däten – wat jo leider uch hüek mächmol vürkütt: die meenten, sie wöre mij wert als andere; die sich de besten plätze ussöcken däten, und meenten: mach mir ens Platz, sühste de net, datt ich he kummen! Ja wöödich kunnt Jesus wäden, wenn andere meenten besser ze wissen, mit wemm er sich avzejeffen hat un mit wem nit. Immer widder hätt er unger Beweis gestellt, dass er für alle Minsche gekumme is, ejal woher se kohme, wat se studiert hatte, wat se an de Fööß hatte oder wie se ussoche. Brücken hät er jebaut un nitt Muure huhjetrocke. Bis hüek is et ihm

en großes Anliegen, die Minsche zusamme ze bränge und zo verbinde, und nit ze spalte oder usserein ze bränge. Dumme nit verjesse: schon ahn de Kripp wor jo en bunt Völksche zesamme: enfaache Hirten, funkelnde Engele, und jelehrte Weise von janz wigg fott. Einfach e kunterbunt Schmölzje! Und dat Wunder wor: Sie han sich all verdraje!

Un selevs am letzte Ovend hat hä noch lauter fixe Ideen in Hätz un Kopp, wo kinner mit jerechnet hat. Ze saje, *wenn ihr su zusammenkutt wie düsse Ovend, Brut und Wing zesamme deilt, dann könnt ihr sicher sinn: do bin ich dabei. Un ich sajen üch: dat ist vill mi als nur prima!* Dat wor schon en einzigartig verrück Idee und Versprechen, upp dat nur de leeve Jott kumme und dat nur er allein realisiere kunnt. Dat is jo nit ze verstonn un ze bejrieve bis up de heutige daach – äver mir don jood daran, die Inladung immer wider ahn ze nemme – denn sie kann uns vill Freud schenke, die man an andere verdeele künne.

Un als hä dann noch anfing, singe Fründe de Föß ze wäsche, ich jlöv, do han vill gedacht: jetzt is hä knatsch verrück! De Petrus hät em joh ne Vuel gezeich, und wohl et nit zo losse, äver er hat kin Wahl. Et is nüdig und jod, datt mir in de Kirch dat gerade hück widder neu liere müsse – nitt en Machtzepter ze schwinge – sondern de Minsche mit Hätz ze deene un fründlich ze froje, war mir denne doon künne.

Un sojar de Unterwelt hät Jesus jo dann up de Kopp jestallt, als hä jestorve und bejgrave wor. Wie us de Versenkung aufgetaucht, wor hä up einmol widder do - un hätt de Emmausjünger einjelade, sich ze freue und an ihn ze jläuve.

Mir all sin jood berooden, in düsse Daajen, die jo wahrlich nit einfach sinn, nit ze verjesse, dat Jesus uch jesaat hät: *Maat üch nit zo vill Sorje! Wenn sich de Sorje uch in in üch stapele, et Hätz schwer wüt, un ihr nur noch schwazz seht, dann luurt üch de Lilien und de Bloomen up de Wiss ahn. Kleervt mit üren Jedanken un Ojen nit nur am Schlächten, und werd bedröf, sondern seht uch dat Schöne, wat et immer noch jütt, wat tücher de Minsche passiert und uns laache mat und fruh. Doht üch berühe loße van de Not der Minsche und dot helepe, wie ihr könnt, äver fiert uch ühr Feste – damit de sil im Jleichjewich blivt.*

Lev Christeminsche, noh den Fuswaschung hätt jesu jesaat: ich han et üch vürjemaat, damit ihr et mir nohmache doot.

Lose me uns de novend neu infiziere mit der jecken Liebe Jottes, die kin Jrenze kennt und kinnen usschleest. Die övverascht, wo mer nit damit rechnet. Zum Beispiel, wenn mir uns üvverwinde däten, enem jroßzüjig zu verjevve, mit dem mir im Knist lieje, der et eijentlich janit verdeent hät; oder nem andere ze helepe, der mich selver im Stich jelossen hät, als ich en broht. Liere mer van Jesu, de Minsche us nem neuen Blickwinkel ze belure, nämlich mit Liebe und Interesse, immer parat, wirklich menschlich mitenein respektvoll ümzejon. Und dat janz unabhängig dovan, wie ener ussüht, wo ener herkütt, wat er für en Sproch spricht und wat hä jläuve - oone Angs, sellever ze kurz ze kumme und jeleiht von de Erkenntnis, dat der andere, all dat, war mir fremd ist und anders, als ich et kenne, ming Levven bereichern und minge Horizont jünstig expandieren kann. Su ze denken und su ze handele, dat maat ne Bürjer un ne Bürjerin im Jeckenland us. Un et wör dem Herrjott en jruße Freud, wenn he jelten dät: *Am Aschermittwoch, is dat noch lang nit vorbei...*

Bernd Kemmerling, Pfr.